

1359

Broj: 01-33-2794/20
Sarajevo, 12.05.2020.godine

SKUPŠTINA KANTONA SARAJEVO
n/p Predsjedavajućeg
n/p Zastupnica Jasna Duraković

PREDMET: Odgovor na zastupnička pitanja, dostavlja se -

Veza: Vaš akt broj: 01-04-10308-5/20 od 23.04.2020. godine, zaprimljen
04.05.2020. godine

Poštovana/i,

Federalno ministarstvo zdravstva zaprimilo je akt Skupštine Kantona Sarajevo broj: 01-04-10308-5/20 od 23.04.2020. godine kojim se dostavljanju pitanja zastupnice Jasne Duraković, postavljena na 24. Radnoj sjednici Skupštine Kantona Sarajevo održanoj 23.04.2020. godine, i to kako slijedi:

- *Zašto se ljudi koji su proveli 14 dana u karantenu u Studentskom domu Bjelave, a pri tom su nakon testiranja bili negativni na COVID-19, ne puste kućama?*
- *Ko je i po kojim preporukama donio novu odluku da se ovi ljudi zadržavaju do 28 dana i da li je to preporuka SZO?*
- *Zašto se ovi ljudi koji su testirani negativno na koronavirus drže u neadekvatnim uvjetima (male i skućene sobe, a imamo nekoliko majki s malom djecom koje su primorane tu boraviti) i zašto im se ne omoguću uzimanje propisanih terapija za druge bolesti od kojih eventualno boluju?*
- *Zašto još uvijek svi koji borave u Studentskom domu Bjelave nisu testirani?*

U svezi sa postavljenim pitanjima, dostavljamo sljedeće informacije:

Jedna od mjera zaštite od zaraznih bolesti je i karantena koji je reguliran člankom 46. Zakona o zaštiti pučanstva od zaraznih bolesti („Službene novine Federacije BiH“, broj 29/05). Karantena je mjera ograničavanja kretanja i omogućavanja obveznih medicinskih pregleda osoba koje su bile, ili za koje se sumnja da su bile u kontaktu sa osobom koja ima zaraznu bolest COVID-19. O stavljanju u karantenu i određivanju prostora za karantenu odlučuje federalni ministar zdravstva rješenjem, a na temelju epidemioloških izvješća mjerodavnih zavoda za javno zdravstvo: zavoda za javno zdravstvo kantona i Zavoda za javno zdravstvo Federacije BiH. Duljina zadržavanja u karanteni je vremenski interval dvostrukog najduljeg inkubacijskog razdoblja za određenu bolest. Karantena se fizički osigurava od ovlaštenih osoba mjerodavnog kantonalnog ministarstva unutarnjih poslova. Troškovi karantena padaju na teret Proračuna Federacije BiH.

Federalni ministar zdravstva je, sukladno svojim ovlastima iz članka 46. Zakona o zaštiti pučanstva o zaraznih bolesti, uzimajući u obzir Odluku Vlade Kantona Sarajevo broj: 02-04-9465/20 svojim rješenjima broj: 01-33-1696/20 od 26.03.2020. godine i broj: 01-33-1790/20 od 04.04.2020. godine, odredio karanten na području Kantona Sarajevo lociran u objektu Studentskog doma „Bjelave“. Sukladno ustavnoj podjeli nadležnosti u području zdravstva, operativna organizacija karantena u Federaciji Bosne i Hercegovine je u nadležnosti tijela kantona, a troškove karantena snosi Proračun Federacije Bosne i Hercegovine.

Federalni ministar zdravstva je sukladno svojim ovlastima iz članka 46. Zakona o zaštiti pučanstva o zaraznih bolesti donosio rješenja o stavljanju osoba u karanten, prateći pri tome epidemiološku situaciju i informacije dostavljene od Zavoda za javno zdravstvo Federacije BiH.

Pandemija COVID-19 predstavlja, po obimu, načinu i brzini širenja zaraze, smrtnosti i ukupnim posljedicama, do sada nepoznatu pojavu u novijoj povjesti Svijeta. Još uvijek ne postoji cjepivo, a niti verificirani klinički ispitani i odobreni lijekovi koji bi se primijenjivali kao terapija u slučajevima oboljelih od virusa COVID 19. U takvim okolnostima, svi nadležni organi i službe, a naročito zdravstvene institucije kontinuirano su vršile i vrše analize i procjene na temelju kojih određuju odgovarajuće mjere. Mjera stavljanja u karanten je jedan od općeprihvaćenih načina sprječavanja širenja epidemije i primjenjuje se u velikom broju zemalja obuhvaćenih pandemijom, kao i u zemljama neposrednog okruženja. Svakom pojedinačnom donošenju rješenja kojim se određuje mjera karantena prethodila je odgovarajuća analiza i procjena nadležnog zavoda za javno zdravstvo.

Mjera stavljanja osoba u karanten utvrđuje se u dvostrukom trajanju inkubacijskog razdoblja tj. 28 dana, a u smislu članka 46. stavak (4) Zakona o zaštiti pučanstva od zaraznih bolesti. Dakle, duljina trajanja mjere je eksplicitno Zakonom utvrđena. Međutim, data je preporuka Svjetske zdravstvene organizacije (SZO), tj. mogućnost da nakon isteka 14 dana inkubacijskog razdoblja i obavljenog epidemiološkog izvješća od strane zavoda za javno zdravstvo kantona, kao i rezultata testiranja koji moraju biti negativni, mjera stavljanja u karanten može biti prekinuta rješenjem federalnog ministra zdravstva. U slučaju pozitivnog testa mjera bi trajala do isteka 28 dana, uz mogućnost prekida po dostavljenom dokazu da je osoba oporavljena, tj. negativna na koronavirus. O tome je Federalno ministarstvo zdravstva obaviješteno putem Zavoda za javno zdravstvo Federacije Bosne i Hercegovine (broj: S-02-02-1-518-2/20 od 14.04.2020. godine). Aktom Federalnog ministarstva zdravstva broj: 01-33-1913/20 od 14.04.2020. godine jasno je propisano postupanje nadležnih kantonalnih organa u ovim slučajevima, te je preporuka Zavoda za javno zdravstvo Federacije Bosne i Hercegovine proslijeđena kantonalnim zavodima za javno zdravstvo i drugim nadležnim kantonalnim tijelima.

Ovim putem navodimo da preporuku Svjetske zdravstvene organizacije o mogućnosti skraćivanja trajanja karantene u uvjetima pandemije COVID-19 u svijetu, u odnosu na duljinu karantene koja je propisana u dvostrukom trajanju inkubacijskog razdoblja, u smislu članka 46. stavak (4) Zakona o zaštiti pučanstva od zaraznih bolesti, treba smatrati međunarodnim standardom, a u smislu članka 2. Ustava Bosne i Hercegovine.

Kantonalni zavodi za javno zdravstvo su postupali prema spomenutoj preporuci, vršili su testiranja i retestiranja, te o tome obavještavali Federalno ministarstvo zdravstva. Ukoliko su rezultati testiranja na koronavirus negativni za osobe u karantenu, zavodi su davali prijedlog da se mjera stavljanja u karanten prekine, odnosno da se obustavi izvršenje rješenja federalnog ministra zdravstva. Ovo Ministarstvo je odmah po primitku takvih izvješća i prijedloga postupalo, te donosilo rješenja o prekidu mjere. Ovo uključuje i postupanje prema osobama smještenim u Studentskom domu „Bjelave“, kao karantenskom prostoru određenom za područje Kantona Sarajevo. J.U. Zavod za javno zdravstvo Kantona Sarajevo dostavljao je selektivno rezultate nalaza na testiranje vezano za koronavirus, te su osobe na temelju negativnih nalaza, puštane iz karantena. Slijedom poštivanja preporuke SZO, odnosno Zavoda za javno zdravstvo Federacije BiH i obavljenih testiranja na koronavirus, osobe smještene u karanten na području Federacije BiH nisu u karantenima provele 28 dana, kako je to prvobitno bilo naznačeno u rješenjima federalnog ministra zdravstva, već je to razdoblje skraćeno na 14 dana. Određene osobe provele su u karantenu i manje od 14 dana (hronično oboljeli od teških bolesti i sl.), a za koje je rješenjem mjera prekinuta, po dostavljenim nalazima o testiranju i opisu teške kliničke slike uzrokovane hroničnim oboljenjima.

Vezano za uvjete prostora i objekata koji su određeni kao karantenski prostor, ističemo da je ovo Ministarstvo postupalo po prijedlogu nadležnih vlada kantona, koje su dostavljale prijedloge za područje svog kantona, a na temelju procjene pogodnosti prostora za karanten, koju je davao nadležni zavod za javno zdravstvo kantona. Osim toga, na temelju tih akata, Zavod za javno zdravstvo Federacije BiH je izdavao epidemiološko izvješće. Federalno ministarstvo zdravstva nije zaprimilo prigovore osoba smještenih u karanten glede uvjeta vezanih za sobe i boravak, kao i uzimanje redovite terapije, konkretno, u Studentskom domu „Bjelave“.

Kada je riječ o testiranju na koronavirus osoba koje su smještene u Studentskom domu „Bjelave“, a prema informacijama Zavoda za javno zdravstvo Kantona Sarajevo, ističemo da su osobe testirane, i to prema medicinskom protokolu (12. i 14. dana boravka), a potom su napuštale karanten, ukoliko su rezultati testiranja bili negativni. Određene osobe su testirane i ranije, a shodno uočenim simptomima, ili zbog prisustva hroničnih bolesti, a po preporuci liječnika obiteljske medicine, koji je obavljao preglede osoba smještenih u karanten.

Vlada Federacije BiH, Federalno ministarstvo zdravstva, Federalna uprava za inspekcijske poslove i dr., u okolnostima koje su bez presedana i za koje još uvijek nije pouzdano predvidljiv ishod, postupaju sukladno Zakonu o zaštiti pučanstva od zaraznih bolesti, Međunarodnim zdravstvenim propisima (IHR) koji primjenjuju sve članice Svjetske zdravstvene organizacije, preporukama Svjetske zdravstvene organizacije, ali i vlastitih procjena epidemiološke situacije u zemlji. Svi podatci iz Federacije BiH, kao i podatci o mjerama koje se poduzimaju na temelju procjene epidemiološke situacije, u svezi pandemije COVID-19 se redovito dostavljaju Uredu Svjetske zdravstvene organizacije u Sarajevu.

Niti jedna mjera, uključujući i određivanje mjere stavljanja u karanten za određene kategorije osoba u Federaciji BiH, nema za cilj sprječavanje ili ograničavanje temeljnih ljudskih prava i sloboda, nego se radi o mjerama koje se poduzimaju

isključivo u interesu zaštite javnog zdravlja pučanstva Federacije BiH, u okolnostima pandemije, koja, ukoliko izmakne kontroli, može imati nesagledivo teške posljedice.

S poštovanjem,



MINISTAR

Doc. dr. Vjekoslav Mandić

Kopija:

- Vlada Kantona Sarajevo
- Ministarstvo zdravstva Kantona Sarajevo